

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

## **KHUTBA JUMMAH**

### **HADHRAT MUHYI-UD-DIN AL-KHALIFATULLAH**

#### **MUNIR AHMAD AZIM**

11 Janvier 2019

04 Jamadi'ul Awwal 1440 AH

**Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :**

### **LA PAUVRETÉ, LE SILENCE ET LA FOI**

Dans lizié d'Allah, ena bane dimounes ki ena bane statuts supérieurs, bane tels dimounes ki bane VVIP (c.-à-d., plisse ki VIP, bane dimounes ki vraiment ena beaucoup l'importance auprès d'Allah). Zot content Allah et Allah content zot. C'est bane tel dimoune ki opprimé par bane dimounes et ki subir la domination de bane les autres. Nous bizin tous les temps traite sa bane kalité dimounes là bien. Sa c'est le conseil du Saint Prophète Hazrat Muhammad (saws) à so représentant, Mu'az bin Jabal (ra), kan li ti nomme li comme gouverneur de Yémen. Fine rapporté ki le Messager d'Allah (saws) ti attrape bane rênes (ene sorte de la corde) de Mu'az (ra) so cheval et li fine donne li continuellement bane conseils. Hazrat Muhammad (saws) fine conseille li pou faire attention à la malédiction d'ene dimoune ki opprimé ! Parski pas ena aucaine voile entre sa invocation là et Allah. (Bukhari & Muslim).

Le Messager d'Allah (saws) fine par ailleurs dire : « *La malédiction de l'opprimé li pou sans aucaine doute exaucée, même si dimoune là li ene mauvais dimoune, parski so mal li zis contre li-même.* » (Ahmad).

Fine rapporté par Ibn Hibaan ki le Saint Prophète (saws) fine dire ki Allah (swt) pou appelle bane pauvres le Jour du Jugement et pou faire zot rentre dans paradis en premier sans rendre comptes. Quant à bane riches et bane chefs, zot pou bizin attane et ensuite rende comptes. Nous Saint Prophète (saws) fine dire: « *Bane pauvres pou rentre dans Paradis cinq cent ans (500) avant bane riches.* » (Tirmidhi).

Le Saint Prophète (saws) fine dire : « *Rode moi parmi bane pauvres et bane faibles. Parski Allah pourvoie (nourri) zot et aide zot à cause de zot faiblesses.* » (Abu Dawud).

Allah Ta'ala défende bane ki pas défende zot-même. La légitime défense li permette, mais la noblesse de l'islam enseigne nous pou retire nous de bane discussions en silence. Celui ki démontrer ene telle noblesse d'âme, alors Allah Ta'ala Li-même prend so défense.

Allah Ta'ala ti prend la défense du Saint Prophète (saws) à travers bane dizefs pigeon et difil z'araignée dans la grotte de Thaur. Allah Ta'ala fine accorde la patience à Hazrat Moosa (as) so peuple. Allah dire dans Quran Shareef :

**« Et bane dimounes ki ti opprimé, Nous fine faire zot hérite bane parties orientales et occidentales de la terre ki Nous fine béni. Et sa zoli promesse de to Seigneur lor bane z'enfants Israël trouve so l'accomplissement à cause de zot l'endurance. »** (Al-Arraf 7 : 138).

Couma zot conner, dans l'époque avant l'Islam, avant la naissance du Saint Prophète (saws), kan bane Mecquois ti sauver devant Abraha et so bane éléphants et ki Ka'aba Shariff ti vine sans défense contre sa tyran là, alors Allah Ta'ala Li-même fine défende Ka'aba avec bane z'oiseaux et bane roches. Et en vérité, bane ki oppose zot à Allah et incite So colère pou être anéanti et zot pou trouve zot perdi dans l'obscurité d'ene désespoir et punition sans fin.

La noblesse d'âme de celui ki pas défende li-même vine de la peur (crainte) d'Allah – Le *Taqwa*. Sa kalité dimoune là gagne peur pou dépasse bane limites et attention ki zot action pas faire plaisir Allah. Li gagne peur ki kan li défende li-même, li capave alle dépasse limites et montrer li injuste. Nous trouve sa très

clairement dans l'histoire de garçon Adam, *Habeel* (Abel). Allah Ta'ala raconte discussion ki ti ena entre li et so frère criminel *Qabeel* (Caen) :

**« Si to étendre to la main vers moi pou touye moi, mais moi mo pas pou étendre mo la main pou touye toi : parski mo gagne peur Allah, le Seigneur de l'Univers. »** (Al-Maïda 5 : 29).

Ki zoli réponse sa ki Abel (*Habeel*) ti donne so frère injuste et ki ti rempli de jalousie ! Bien ki tous les deux ti oulé donne ene offrande, ene sacrifice à Allah, mais la manière de faire de tous les deux ti opposé. Ene ti sincère, honnête et ti ena la crainte d'Allah, tandis ki l'autre là ti imbu de li-même et fou de jalousie, parski li ti soif pou gagner, et li ti prêt à tout pour réussi, même si li bizin touye so frère pou arrive à so fin ! Allah ti Témoin de so révolte et fine accepter la piété et le sacrifice de *Habeel*, ene tel sacrifice ki complet parski li fine aussi vine le premier martyr pour la cause d'Allah.

Et puis finalement, la preuve li trouve dans le Hadith de Musnad de Imam Ahmad ki ene kikaine ti pé zoure (maltraite) Hazrat Abu Bakr (ra) en présence du Saint Prophète (saws). Tanque ki Abu Bakr (ra) ti pé reste tranquille, le Saint Prophète (saws) ti pé apprécier et souriyé. Mais kan Abu Bakr (ra) fine perdi patience et réponne par bane paroles blessants, alors le prophète (saws) fine en colère et fine quitte sa place là. Plus tard, Abu Bakr (ra) fine demande li kifaire li fine lever. Hazrat Muhammad (saws) fine dire li : « *Kan to ti reste tranquille, Allah ti envoie ene ange pou réponne en to faveur, et kan to fine commence réponne, alors Satan fine vini. Et en vérité, li pas convenir à moi pou assize avec Satan. »*

Donc, nous trouver commié le silence li bien important, comme dit sa parole là, « le silence est d'or ». Ena beaucoup bienfaits dans le silence. Pour sa raison là ou pour ene l'autre raison, Abu Bakr (ra) ti prend l'habitude pou mette ene ti roche dans so la bouche afin pou pas dire kitchoses ki li pou regretter après.

Ki Allah compte nous toujours parmi So bane proches et bien-aimés, et ki Li aide nous pou retenir nous la langue, même si nous ena raison, parski kan nous garde le silence, nous pé recherche l'aide puissante d'Allah face à bane opposants et zot bane complots et moqueries. *Insha-Allah, Ameen.*